

ՄՅՈՒՆԻՔԻ ՄԱՐԶՊԵՏ ՌՈԲԵՐՏ ՂՈՒԿԱՍՅԱՆԻ ՇՆՈՐՀԱՎՈՐԱԿԱՆ ՌԴԵՐՁԸ ԳԻՏԵԼԻՔԻ ԵՎ ԴՊՐՈՒԹՅԱՆ ՕՐԿԱ ԱՌԹԻՎ

01.09.2026



Սիրելի՛ սովորողներ, մանկավարժներ և ծնողներ

Սեպտեմբերի 1-ը մեզ կրկին հիշեցնում է, որ սովորելը երբեք չի ավարտվում, և յուրաքանչյուր Նոր ուսումնական տարի զարգացման ու Նոր գիտելիք ձեռք բերելու հնարավորություն է:

Ջերմորեն շնորհավորում եմ բոլորիս Գիտելիքի և դպրության օրվա առթիվ:

Մենք ապրում ենք արագ փոփոխվող աշխարհում, որտեղ միայն փաստեր անգիր անելն այլևս բավարար չէ: Մեր երկրում իրականացվող կրթական բարեփոխումների հիմքում այն տրամաբանությունն է, որ երեխային պետք է պատրաստել ոչ միայն հերթական քննությանը, այլև այն կյանքին, որն այսօր դեռ ամբողջությամբ չենք կարող կանխատեսել:

Դպրոցը պետք է սովորեցնի չվախենալ բարդ խնդիրներից, տարբերակել տեղեկությունը փաստից, վերլուծել գիտելիքն ու ինքնուրույն որոշումներ կայացնել:

Այս նպատակին են ծառայում նաև Սյունիքում կառուցվող և հիմնանորոգվող դպրոցները: Դրանք պարզապես շենքեր ու ենթակառուցվածքներ չեն, այլ այն միջավայրը, որտեղ պետք է ձևավորվի վաղվա քննադատական միտքը: Մեր նպատակն է, որ մարզի դպրոցներում սովորելու համար անհրաժեշտ պայմանները շարունակաբար բարելավվեն, իսկ յուրաքանչյուր երեխա հնարավորություն ունենա ստանալու որակյալ կրթություն՝ անկախ նրանից, թե Սյունիքի որ բնակավայրում է ապրում:

Սիրելի՛ ուսուցիչներ, շնորհավորում եմ ձեզ ու շնորհակալություն հայտնում մեր մարզի դպրոցներում ձեր բարդ, կարևոր և անչափ պատասխանատու աշխատանքի ու նվիրվածության համար, որի իրական արդյունքը երբեմն երևում է միայն տարիներ անց՝ ձեր աշակերտների հաջողությունների մեջ: Անսպառ ուժ ու համբերատարություն եմ մաղթում ձեզ:

Սիրելի՛ աշակերտներ և ուսանողներ, ուսումնառության տարիները սեփական ուժերը բացահայտելու ամենաճիշտ ժամանակն են: Թող այս ուսումնական տարին ձեզ համար չսահմանափակվի միայն դասերով ու գնահատականներով: Փնտրե՛ք գիտելիք դասագրքերից դուրս, հետաքրքրվե՛ք Նոր տեխնոլոգիաներով, և մի՛ կորցրեք ամենօրյա կապը ձեր համայնքի ու Սյունիքի կյանքի հետ: Հատուկ շնորհավորանքս՝ մեր առաջին

դասարանցիներին. Եղե՛ք համարձակ ձեր Նոր միջավայրում և երբեք մի՛ դադարեք զարմանալ ու հարցեր տալ:

Սիրելի՛ ծնողներ, Սեպտեմբերի 1-ը Նաև ձեր տոնն է, որի առիթով շնորհավորում եմ բոլորիդ: Երեխայի հաջողության համար դպրոցի աշխատանքի հետ մեկտեղ հավասարապես կարևոր են ընտանիքի վստահությունն ու աջակցությունը: Եղե՛ք ձեր զավակների կողքին այս կարևոր ճանապարհին:

Բոլորիդ խաղաղ ու ստեղծարար ուսումնական տարի եմ մաղթում: Խաղաղ միջավայրն այն կարևոր պայմանն է, որը երեխաներին ու երիտասարդներին հնարավորություն է տալիս կենտրոնանալու ուսումնառության, ինքնազարգացման և ապագայի ծրագրերի վրա՝ առանց ներկայի համար անորոշության ու անհանգստության:

Բարի՛ մեկնարկ և հաջողություններով լի ուսումնական տարի՝ Սյունիքի բոլոր կրթական հաստատություններին, ուսուցիչներին և սովորողներին: